

Editorial



E peliger di hotelnan 'all inclusive' ta causa hopi preocupacion

Nos ta na altura y ta comprende cu Minister Oduber den su afan di promove turismo riba nos Isla a firma un acuerdo cu Grupo Piñero, un cadena di hotel 'all inclusive' di Spaña.

E acuerdo aki ta encera terreno y facilidadnan pa construi y opera un hotel na Baby Beach, di mas cu 900 camber. Aki nos ta haci entrega di un di e poco beach cu a keda pa Arubianonan y atrobe patrimonio di pueblo ta wordo duna na un Grupo cu ta opera hotelnan exclusivamente segun e sistema di 'all inclusive'. Den e sistema aki un turista ta paga un suma pa dia pa camber y esey ta inclui tur cuminda y bebida, parasol, actividadnan di lama etc. No ta keda espacio pa ningun hende saca algo di e tipo di turista aki.

Ta di spera cu e minister haci su trabou bon ya cu e mercado laboral ta hopi delicado y cu un proyecto asina lo tin su im-

pacto negativo riba e aspecto socioeconomico. Riba esaki nos ta muestra riba e necesidad di importa mas trahado stranhero, mas cupo na scol pa nan yiu y asina un sin fin di efectonan grave pa nos comunidad cu ya ta muestra cu no tin cama pa tanto hende.

Esaki por tin su consecuncianan grandi pa e economia di Aruba y ta p'esey mes nos Gobernantenan mester nenga na otorga e tipo di permisonan aki. En todo caso studia e materia aki cu mas diligencia y cu seriedad sin haci politica di momento. E consecuencia por ta grave te fatal.

Algun di e consecuncianan directo pa gobierno y pueblo ta:

Por manipula facilmente cu e prijs di camber y prijs di bebida pa asina paga 30% menos na impuesto di estadia.

Ora prijsnan bira hopi competitivo e producto lo bira inferior of menos pa asina por

mantene margen di ganashi te hasta cu e lo por tin consecuncianan pa cu e salario di empleadonan.

Esaki ta stanca e entrada insular debi cu e entrada economico di mas cu 75 porciento ta wordo canalisa solamente riba e propiedad. Mayoría di fondo no ta yega e destinacion socio-económico di e pais, esta e actividad economico pa Aruba. Pues e suma cu e turista cu ta bin pa uzo di facilidadnan di 'All Inclusive' ta gasta 80 porciento menos.

Esaki ta inconsistente cu e infraestructura cu a wordo traha rond di Palm Beach pa entretenimento entre otro establecimentonan pa cuminda, bebida y haci compras.

Esaki lo crea un efecto di domino unda cu tur otro propiedadnan pa keda competi eventualmente lo cambia pa e modelo di negoshi aki. Lo e bira mescos cu Jamaica unda cu pa motibo cu a hiba e economia atras, seguridad a bira

asina importante cu e turista no ta sali pafó di e hotel mas Mescos cu companianan di crucero, e hotelnan aki lo canalisa tur e actividadnan manera excursion etc. riba e isla via nan cu un margen di ganashi lagando poco pa esunnan cu ta opera e negoshinan aki.

Pasobra e hotelnan aki ta traha cu prijsnan abou nan ta pusha e turistanan existente pa otro destinacionnan unda cu nan tin otro hotelnan, asina aleha e turista frecuente pa semper. Nan ta uza p.e. un top destinacion (manera Aruba) pa atrae e turista y despues ta switchnan pa un di nan propiedadnan mas barata unda nan margen ta mas grandi.

Tipicamente e hotelnan aki ta haci nan comprasnan afo den gran cantidad y asina no ta uza e distribuidornan local.

Tambe nan ta zorg pa nan importa trahadonan y ofreciendo alohamento pa asina haci nan ganashi mas grandi. □